



TEKS UCAPAN

**YB HANNAH YEOH
MENTERI DI JPM
(WILAYAH PERSEKUTUAN)**

**ISTIADAT MENGHADAP DAN ISTIADAT
PENGURNIAAN DARJAH KEBESARAN,
BINTANG DAN PINGAT WILAYAH
PERSEKUTUAN 2026**

**5 FEBRUARI 2026 (KHAMIS)
BALAIRUNG SERI, ISTANA NEGARA
KUALA LUMPUR**

PEMBUKAAN

Salam Sejahtera dan Salam Malaysia MADANI.

Mengadap Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim.

Mengadap Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

Ampun Tuanku beribu-ribu ampun,

Sembah patik mohon diampun,

1. Dengan penuh hormat dan takzimnya, patik sekalian merafak sembah dan menjunjung kasih Kebawah Duli Yang Maha Mulia Seri Paduka Baginda Tuanku berdua atas limpah perkenan berangkat ke Istiadat Pengurniaan Darjah Kebesaran, Bintang dan Pingat Wilayah Persekutuan bagi Tahun 2026.

2. Keberangkatan Tuanku berdua memberi makna yang cukup besar buat patik-patik sekalian rakyat.

Ampun Tuanku,

3. Patik ingin mengambil kesempatan ini untuk menzahirkan rasa setinggi-tinggi syukur dan menjunjung kasih Kebawah Duli Yang Maha Mulia Seri Paduka Baginda Tuanku atas perkenan melantik patik sebagai Menteri di Jabatan Perdana Menteri (Wilayah Persekutuan).
4. Patik bersama-sama semua warga kerja Jabatan Wilayah Persekutuan (JWP) dan agensi di bawahnya berjanji akan memberikan komitmen penuh bagi **memperkasakan Wilayah Persekutuan** demi kesejahteraan rakyat dan menjadikan Wilayah Persekutuan **sebuah Wilayah yang terbaik untuk didiami.**

Ampun Tuanku,

5. Menyusuri tahun 2026 ini, patik akan terus menyokong usaha pembangunan nasional untuk menjadikan Wilayah Persekutuan terus gah di hadapan dan berdiri sebagai **tunjang kepada ekonomi MADANI**.
6. Prestasi semasa ekonomi Wilayah Persekutuan sangat memberangsangkan apabila **pertumbuhan KDNK Kuala Lumpur dan Putrajaya (6.2%)** serta **Labuan (5.4%)** mengatasi purata nasional (5.1%).
7. Oleh itu, satu strategi berfokus yang patik akan ketengahkan pada tahun ini adalah pertama; membina ekosistem kehidupan mampan dengan **mengukuhkan nilai integriti** yang menjadi asas kepercayaan rakyat.

8. Kedua; **memastikan kebersihan bandar dijaga**. Ketiga; **meningkatkan keselamatan rakyat** melalui pengurusan mitigasi banjir.
9. Keempat; **memberi keutamaan kepada kesejahteraan rakyat**; dan kelima; **memastikan Sasaran Pembangunan Mampan (*Sustainable Development Goal*)** di bandar dapat dicapai.

Ampun Tuanku,

10. Patik dengan penuh takzim menjunjung kasih atas pandangan dan pedoman Kebawah Duli Yang Maha Mulia Seri Paduka Baginda Tuanku yang sentiasa menekankan betapa pentingnya **amanah, integriti dan tadbir urus** yang bersih dalam pentadbiran negara.

11. Sehubungan itu, patik menzahirkan ikrar bahawa segala urusan pentadbiran dan pelaksanaan inisiatif di Wilayah Persekutuan akan dilaksanakan dengan penuh **kejujuran dan tanggungjawab** tanpa berkompromi terhadap sebarang bentuk salah guna kuasa atau penyelewengan.

Ampun Tuanku,

12. Patik serta seluruh jentera pentadbiran akan memastikan Kuala Lumpur diperkasa sebagai **wilayah ekonomi yang makmur**, Putrajaya kekal sebagai **nadi pentadbiran negara** manakala Labuan dipacu sebagai **hab ekonomi biru dan hab pelancongan utama Borneo**.

13. Selain itu, infrastruktur Wilayah Persekutuan akan terus diselenggara tanpa mengabaikan keunikan khazanah warisan dan identiti budaya masyarakat kita.
14. **Perpaduan rakyat berbilang kaum** adalah kunci kemakmuran Wilayah Persekutuan. Oleh itu, patik turut komited untuk memelihara keharmonian ini sebagai tanggungjawab bersama seluruh warga.

Ampun Tuanku,

15. Akhir kata, demikianlah sembah ucapan patik bagi pihak sekalian warga Wilayah Persekutuan, memohon doa semoga Kebawah Duli Yang Maha Mulia Seri Paduka Baginda Tuanku berdua serta Yang Amat Mulia Paduka-Paduka Anaknda dan seluruh Kerabat Diraja **dilanjutkan usia, dilimpahkan rahmat** serta **diberikan kesihatan berpanjangan** untuk terus menaungi negara dan Wilayah yang tercinta ini.

16. Didoakan juga agar semua usaha-usaha baik ini dipermudahkan tuhan dan Wilayah Persekutuan sentiasa **diberkati, maju** dan **sejahtera**.

Selamat Hari Wilayah Persekutuan.

Daulat Tuanku.

Dirgahayu Tuanku.